

四庫全書

集部

欽定四庫全書

集部

兩宋名賢小集卷一百四十一至

六

詳校官中書臣 閔思毅

助教臣 常循覆勛

總校官編修臣 王燕緒

校對官編修臣 何循

騰錄監生臣 任相

欽定四庫全書

兩宋名賢小集卷一百四十一

宋陳思編

元陳世隆補

環碧亭詩集

沈晦字元用錢塘人舉宣和狀元御試策題舉子不能徐對晦精通象數一揮千言祐陵子聞喜宴上以

御詩寵之除著作郎金人攻汴從肅王出質後得還

為給事中高宗將名為中書舍人有論其布衣時事
帝曰頃在金營見其慷慨士人細行豈足為終身累
耶然卒出知平江乞以建康太平鎮江池鄂五郡兵
連衡守江與韓世忠犄角金必不敢渡召募敢戰練
習暮年京口可成強藩趙鼎稱其激昂卒不果用進
徽猷閣直閣學士終知鄆州

題獨秀山

老鶴下遙天昂昂在林表霜毛臨野人逸氣秋天杳

矯矯顏始安不受冠帶繞清真自嵇阮一醉萬事了讀
書空谷中生翳白駒皎長哦吾君詠極目送飛鳥

竹溪

寒流穿清闕支徑入翠微山深古木合林靜珍禽飛居
人本避世遊客亦忘機歸路晚烟暝新月照柴扉

遊松陽百仞山

山頭白雲如擘絮竹雞無聲鳩喚婦團團朝日在林梢
寒日梨花谿口路一峰獨秀橫溪陰青林倒影千丈深

上有白龍蟄幽洞歲旱往往能為霖如今寂寞空山裏
古屋荒壇冷紅紫會看前度種花人他年來作巢居子

竹喀嶺

九月亂山中崎嶇處處同谿流因雨漲木葉著霜紅入
蹟千巖絕松聲萬壑空尋幽自可問不復歎途窮

松陽上方山居五首

月斜樹影穿窗入雨過山泉遶舍鳴野寺中宵人不睡
蒲團布衲悟無生

山中寒早野陰薄
慘慘黃昏欲雨時
市遠無人與沽酒
地爐松火自燒梨

天畔羣峰一草亭
半溪烟雨花冥冥
老翁投老得此景
日與谿山同醉醒

此生真與世相忘
投老生涯寄上方
洗足關門枕書睡
連山松檜雨浪浪

學道空山水月深
丹成初試馬蹄金
猶餘一勺丹泉水
洗盡人間名利心

兩宋名賢小集卷一百四十一

欽定四庫全書

兩宋名賢小集卷一百四十二

宋 陳思 編

元 陳世隆 補

琴溪詩集

李宏字彥恢宣州人博學工文詞建炎中呂好問知
宣州得士四人詹友端周紫芝王相如與宏也每宴
集必與俱惜其詩多不傳宏宣和初以左承值郎署

欽定四庫全書

牙
卷一百四十二

涇縣事紹興初李光為守時復檄署縣凡四載後遷
轉運使

遊金泉觀

昔時謝女昇天處此日遺蹤尚宛然
蟬蛻舊衣留石室
龍飛勝地湧金泉
碑書故事封蒼蘚
殿寫真容鑠翠烟
薄暮松巔聽鶴唳
凌空髣髴是神仙

鳧山廟

并序

顯道廟蓋晉之隱者不顯其名後世無考時寶子明

罷令煉丹陵陽峯與之邂逅遂相與友往來麻川
之望仙絃歌徽水之棲真高嶺皆有蹟焉廟存古
碑具載其事雖剝裂尚可讀政和間賜額鄉人因
大其祠以歆朝寵答神貺今碑已徙置樓基下里
有裘氏者年八十餘尚能言之乃悉如前所說予
懼後人無所考徵輒成長句以記其實庶幾傳信
焉詩曰

鳧山高與蒼旻齊根盤八里雄坤維

一作
輿

油然出雲為

風雨澤周一境無凶飢重樓複殿據山腹蜿蜒攫護神

缺

威靈如在駭聞聽至今父老能言之斷碑刊缺尚

可讀湮埋歲久人無知高高一峯獨秀出上有蟬蛻真

仙居似聞嘗任石埭尹化流德洽真民師持竿戲投白

龍餌隱霧深韜玄豹姿手披藥笈校丹篆足躡飛昇

一作
鳥

騰紫微相逢邂逅一笑粲真將莫逆論心期從茲

來往因無間遺踪所至猶可推絃歌標鄉里猶在望仙

紀地名獨垂棲真寄偉曾稅駕絕頂尚留丹竈基近鄰

督井數盈九石甃堅深端可窺神既廟食還舊隱仙亦
偶坐應禱祈合堂薦享異肴藪乞靈修敬傾里閭政和
天子謹祠祭郡縣有請咸勿違一朝飛章達旒宸往往
一夜曾躬披俞音載錫降芝簡寵賁徽名昭典彝神兮
仙兮服君賜福庇斯民無已時仙將出遊神速往霓旌
絳節相追隨神既來歸仙至止袞衣羽帔瞻光儀繫予
頂謁亦云屢淋漓醉墨聊一揮詞雖蕪顛事撫實庶幾
傳信祛羣疑

兩宋名賢小集卷一百四十二

欽定四庫全書

兩宋名賢小集卷一百四十三

宋 陳思 編

元 陳世隆 補

宗忠簡詩集

宗澤字汝霖婺州義烏人元祐六年進士靖康元年
知磁州勤王兵起康王以澤為副元帥建炎間累遷
延康殿學士京城留守兼開封尹連結諸路義兵方

尅日渡河力請上還京為黃潛善汪伯彥所沮憂憤
疽發背卒贈觀文殿學士謚忠簡有序

東上辭松楸一首

八年坐親黨泯伏長安城甘心傍松楸
我兒子情閉戶慨岩廊讀書笑金籬
力田固為政課童乃司兵深病骨相寒
不蒙軒冕榮維天臨萬邦搜羅世豪英
我友挽出之大人今繼明古無忠孝全
泣涕去丘塋為翁大門閭翻然以東征

感時有序

勃敵長驅京邑陷危此忠臣義士痛心疾首勤王報
國之秋也而宰臣遷家郡守踰垣縉紳士大夫陸竄
水奔使人主嬰孤城以自守無一犯難者事小定矣
而上書獻策之人亦未有慨然以東者世道之衰一
至此乎太息之餘以詩自道

卿士辱多壘天王憤蒙塵御戎要虜將謀國須雋臣百
戰取封侯未必亡其身懷奸廢忠義胡顏以為人吁

嗟世道衰大倻加搢紳平居事奔競梁汴分雲屯一旦國步
艱四迸如星繁輔相已擇栖守令仍踰藩冠蓋陸西竄
舳艫水南奔鄙夫用慨然策馬趨修門勤王羞尺柄悟
主期片言時來倘雲龍戕冠拜臨軒逶迤上玉除造膝
伸元元措世于泰寧歸來守丘樊

曉渡

小雨疎風轉薄寒駝裘貂帽過秦關道逢一澗兵徒涉
赤脛相扶獨厚顏

華陰道中三首

烟遮晃白初疑雪日映瀾斑却是花馬渡急流行小崦

柳絲如織映一作隱人家

管邳作屋細一作幾家居雲雒風帘路不紆坡側杏花溪

畔柳分明摩詰網川圖

寧王畫作金盆鶴韓愈詩誇玉井蓮瓦缶泥泓村落小
亂茅羣雀不堪傳

雨晴渡關二首

燕北靜風塵河南濯我兵風雲朝會合天地晝清明泣
涕收橫潰焦枯賴發生不辭關路遠辛苦向都城

蕩滌真成快氛霾不敢陰萬花恩澤了二麥寵光深地
勢瞻仙掌河源識帝心馬頭迎霽色詩句日邊尋

道逢散遣之卒云講和退師無所用之矣輒以二
十六句道胸臆

翁擁麾幢我為兒剽聞竊睹皆兵機其中襲擊不容瞬
颺行電掣猶逶迤敵人長驅越大河天下震驚觀闕危

肉食之謀殊未臧我憤切骨其誰知慨然奏疏金馬門
力陳盟賂損國威嚴尤下策尤可笑晁錯上書亦奚為
道路荆棘初剪除花如步障吾東之八年閉戶尺蠖屈
一旦渡關匹馬馳行行側身聽奏捷忽聞募士詔遣歸
濃書大墨榜教詔曰敵悔過今退師羽檄向來召貔虎
乃詠出車歌林杜橐兵銷刃兵猶怒却把鉏犂農歌舞
君王神武今藝祖爾如不歸污我斧

又賦一律

罷兵洵上策試問可誠然竟棄三軍力空拋半壁天上
林無旅雁絕域有啼鵑羞見龍泉劍飛光牛斗前

至洛

都人士女各紛華列肆飛樓事事嘉政恐皇都無此致
萬家流水一城花

華下

千巖層出亂雲飛失我平生洞府期夜據征鞍不交睫
舉頭彈指睡希夷

過潼關

一雨峭函底風沙放我過嶽神猶假借官吏莫誰何
斷思航渡城堅戒石摩一夫工墨守寧怯萬夫多

道逢鄉人笑僕騶馬之瘦

生笑長裾曳仍羞下澤奔據鞍非馬授叱馭豈王尊汗
血能觀國的盧終感恩莫欺騶馬瘦揮策詣金門

盤豆鋪南李翁園

李翁卧亭午春深掩柴荆忽聞風雨響疑是勤王兵

題趙園

瑤瑛夾侍梅臺瑟自鳴
松島山中野服相羊足以亡
憂遣老

鑿池智有泉源種木胸無芥蒂
螭頭吐水涓涓端是銀
潢一派

馬上口占

龍興虎視詭周秦
王氣東遊作汴京
陰祝巨靈移此險
大河為塹嶽為城

早發

織幄垂垂馬踏沙水長山遠路多花眼中形勢胸中策
緩步除行靜不詳

謁華嶽

楊賜嶽所擬嚴武金天晶二子為時出顧我非炳靈維
嶽鎮四方氣秀天骨青嶽巖立千仞力能產公卿降神
詠崧高識緯仍反經取象到執珪譎怪如洞冥平生笑
窮竒立語心自驚我質培塿耳曾中固呼縈誰言華岳

高我山摩玉京是中所包藏丹碧參瑰瓊平居蟄雲雷
飛雨溢四溟此豈真有之落筆紛縱橫發我文物祕象
渠膏澤傾太華屹不搖我山身載行

兩宋名賢小集卷一百四十三

欽定四庫全書

兩宋名賢小集卷一百四十四

宋陳思編

元陳世隆補

于湖集卷上

張孝祥字安國歷陽烏江人父祁與胡寅交善秦檜
惡寅羅織及祁并真嶽孝祥年十六領鄉書紹興二
十四年廷試考官擬秦頊首選孝祥次之頊檜子也

高宗親自披閱擢孝祥為第一檜忿甚後孝祥詣檜
檜問習何書答以習顏書又問學何詩答以杜詩檜
佯笑曰好底盡為君占卻也檜死累遷起居舍人歷
知撫州平江靜江俱有聲績尋以荆南湖北撫安撫
使進顯謨閣直學士致仕卒孝祥精翰墨時稱之曰
紫府仙所著有于湖集

赭山分韻得成葉字二首

昨日一尺雪今朝十分晴
杲日上積雪光若虹氣升江

平鏡新磨地迴玉琢成親山有令色令我白眼青借馬
屋東家喚客踏層冰冒貂挾裘茸石路五里平竹樹紛
掩然珠幢間霓旌野僧不慣客倉皇門前迎屋古少完
壁堂虛有危燈石上跡宛宛山腰塔亭亭劫火偶不燒
百年費支撐我有一尊酒高處得細傾諒非無事飲憂
國空含情長歌渺寥廓歸路已載星

萬生紛不同宿昔有定業哀哉彼遷民苦事乃稠疊累
纍庭際炊采采澗底葉問渠何為來悲淚不盈睫連年

避兵亂生理安可說今年更倉皇芻藁亦焚劫扶攜過
江南十口四五活斗米六百錢兼旬又風雪前時詔書
下振廩要周浹聖主甚哀矜我曹空感咽願今兵革罷
復得理歸楫傳聞菰蒲中相殺血新喋本是耕田農飢
寒實毆脅須公語縣吏早與支米帖

椰子酒榼

矮胡生南方託家碧山崖採擇供貢篚扶持上天街愧
此愿慙姿欲售久未諧道旁麩先生風味故自佳逢渠

即傾蓋輸寫能開懷刮削出光彩規繩去敲核金玉豈
足貴膠漆真我儕客來有嘉招二士經必偕婆娑止坐
隅供餽煩金釵矮胡雖本強醇德真無涯虛心實其腹
居然外形骸微物幸見用棄置理則乖毛穎有封國陶
匏薦斂柴大藥起世病炮燔及根芟願子自洗濯勿受
塵埃埋暇日肯相從醉經坐高齋

和何子應賦不欺室韻

隆興天子開千齡六龍飛天動潛鱗東嘉先生初名對

不欺之論驚廷臣誰令浮雲蔽白日脫幘歸來還堵室
巍巍烏府憶霜簡凜凜螭虬有椽筆魏公眼力無餘子
與公周旋豈其死請公細讀不欺銘一字之褒如魯史
某頃蒙信陽使君教以邊字韻佳句伏讀降歎病
勅答謝甚緩復不能竒仰俟斲削二首

風流追數建安年誰遣朱轡並塞邊舉國向來儒服少
是邦端有大夫賢須公帷幄收長策着我江湖刺釣船
池閣最涼肯臨否紅粧翠蓋擁三千

百謫歸來又一年
投身烽火戍樓邊
私憂自笑愚無策
制勝懸知國有賢
北去燕然堪勒石
西來樊口看燒船
中州更有王夫子
筆陣猶能獨掃千

殿廬偶成

簾幙垂垂燕子風
宮花春盡翠陰濃
日長禁直文章靜
寶藝時時一折封

蠟梅

滿面宮粧淡淡黃
絳紗封蠟貯幽香
遙憐未識春消息

乞與一枝教斷腸

重入昭亭賦二十韻

我本山中人對山輒忻然蹉跎落世網欲去常拘牽蒼
鷹着珠鞬側腦思高騫青絲絡奔驥擺脫意乃便抑鬱
不自聊沈冥向誰宣長懷昭亭山積翠摩青天下有千
柱宮突兀數百年往者雲中游羣峰玉回旋飛閣出本
末下睨春無邊堂中二老人龍象開法筵炯炯月在空
浩浩海納川應庵默無言妙處心已傳如庵說千偈微

詞諦真詮靜極炷爐熏對牀且安眠更欲捐冠簪一簞
寄三椽此志竟不遂緇塵亂歸鞭今朝復何朝卻望山中
烟縹緲見樓觀鍾梵聲清圓我攜九節筇飛步雲蘿巔

次韻左舉善木樨

想見秋光插滿頭遙憐不負此山遊一枝併與詩筒饋
氣壓西湖萬斛秋

讀中興碑

繡綉兒啼思塞酥重林燎香驅羣胡阿環錦鞞無尋處

一夜驚眠搖帳柱朔方天子神為謀三郎歸來長慶樓
樓前拜舞作奇祟中興之功不贖罪日光玉潔十丈碑
蛟龍缺擘與天齊北望神臯雙淚落祇今何人老文學

子雲壓境先遣詩次韻

相風日日問長年蠲首遙知近箇邊別後情親難過我
故家人物更誰賢一尊且對荒城酒六月休牽工水船
小此淹留待追詔公車歸奏獨三千

以茶芽焦坑送周德友德友來索賜茶僕無之也

帝家好賜喬雲龍祇到調元六七公賴有家山供小草
猶堪詩老薦春風

即事簡蘇廷藻

落日邊書急秋風戰鼓多私憂真過計長算合如何
盡
斂清淮戍仍收瀚海波棲遲一尊酒幽恨滿關河

罷歸

親老難為住恩深許放歸北行湘水闊南望瘴烟微
兵
衛收門戟征塵上客衣遙知六七月喜氣滿庭闈

三塢寺阻雨

塢上衆鈴語湖頭三月風
蒼山在烟外高浪與天通
市迴薪芻少僧殘像教空
不妨留滯好且看夕陽紅

玉淵亭

夜投寶覺寺徑上玉淵亭
峽束千岬水天分一段星
神光行熠燿空翠矗青冥
雄觀魚幽趣悠然寄獨醒

以上善鳴集

清虛觀

石側疑無路山迴別有天
神泉通玉海帝畫麗奎躔
紫

闈雖重到青瑤卻未鐫只須香案吏為寫白雲篇

廬山志

黃陵廟

百世黃陵廟淒涼屋數間只憐斑楚竹那憶赭湘山訪

古韓碑在徵歌

缺

水間虞嬪更堯女莫作水仙班

長沙志

靳春道中

霜淨波平水落灣我行正在畫圖間簾鉤不用怕風日

且看江南江北山

登馬氏永寧閣和朱漕元順分韻

佛宮昔誰營猶挾蓋世氣應慚割據醜稍識苦空味重
簷隱白屋隆棟湧金地耿耿壁間像尚可將千騎鄉來
歌舞處荒棘擁城雉惟此悲願成歷劫更興起橫撞鐘
萬石妙響驚昏醉憶當風雪晨茲事實經始老僧喜成
就膜拜額有泚喚客饌伊蒲齋房頗深邃空巖才跬步
不往獨何謂徑攜雙竹杖腳力勇難制繡衣兩使者風
誼我所畏相逢瘴海上此樂豈天惠山林與心會風月
可回施聊乘簿書隙拚此一日費摩挲水邊石勝處欲

專美不用濡漆書公詩即行記

次江州王知府叔堅韻二首

何入列屋閉嬋娟
憶對清歌重慨然
一笑相憐窮相眼
漫撩詩思入愁邊

經行有恨是陰雨
不見香爐生紫烟
安得草堂容一榻
聽松聽水日高眠

題張仲欽所藏隆茂宗畫登瀛圖

老隆已死畫筆枯
畫歸天上人間無
公從何處得此圖

眼明嶺外三歎吁天策上將天為徒指揮羣龍清八區
褒鄂英衛供掃除功成告廟金模糊歌童舞女不願渠
乃此數士相為娛鐵面苦口談詩書直欲措世如唐虞
老隆妙手神所摹蒼頭廬兒亦敷腴祝公即歸承明廬
願持此道補帝裾

送劉伯同侍開府公入覲

相公早勒太常銘康樂當家更典型槍急曾看飛鳥過
筆精時作換鶯經極知許國心常赤趣取封侯鬢尚青

若到都城見知舊為言江漢有浮萍

昭亭食柑

一雙分我洞庭秋梨棗旁觀不那羞喚得風霜回齒頰
夜尋清夢五湖舟

和如庵四首

厭聽諸方三昧禪卻思夜雨對牀眠欲知千偈如翻水
看取朝來綠漲川

不談世法不談禪徹曉勦勦一覺眠個裏神通元不小

回風急雨震山川

朝供爐香夜供燈
閒來落得困瞢騰
如庵許我參堂去
長作昭亭粥飯僧

一燈分作百千燈光
徧河沙正鬱騰
稽首應庵休採擇
直須傳與在家僧

再用韻呈仲欽元順

今時朱仲欽文字有奇氣
潛幽睹天奧雋永得古味
袖手閱時紛虛心餘樂地
那持瘴野節不從羽林騎埋輪

吾宗英補袞五色雉去年對延英御坐再三起憂民甚
已溺稽古乃心醉天衢行日月發軔從此始會當紀鴻
業我筆墨先泚相期並徵詔禁殿直清邃尚憶此追遊
班中語相謂我懷江湖去初服反舊制間游靜成趣岐
路險多畏此事屬兩君它年儻終惠長篇起予病妙語
充法施調高和難工初學慚紙費郊原春無數風日極
清美已遣具方舟重游更須記

送子雲倅荊州二首

閱世波流險未涯愛君悃悃靜無譁高門自惜睽三戰
飛珮何當乞九霞喬木世臣餘故國采蘋齊女甚宜家
君王早晚思前席會有徵書訪賈嘉

荆吳相望各天涯惜別尊前菊未華便放扁舟衝駭浪
要看秋日寇輕霞新詩滿路分吾子威業康時是故家
好去依劉靜邊瑣策勲行即賜褒嘉

道間見梅

寒女生來不解粧天然玉色照孤芳疎籬茅舍無端恨

故有幽人與斷腸

贈江清卿

吾友林少穎讀書不記屋抄書手生繭照書眼如燭往
時羣玉府上直對牀宿夜半聞吾伊吾睡已再熟此君
抱高節雪栢映霜竹造物乃兒戲卧病在空谷尚能作
手書寄我成一束我懶更愧渠終歲不報復今來見江
子少穎儼在目不必不如師惟子肖甚速持身嚴法律
自愛比冰玉學官冷徹骨三月食無肉危坐談仁義口

叨若布穀時能從我遊騎馬踏溪淥定自我輩人胸次
不碌碌惟皇開洪業大厦非一木豈有棟梁安而今久
淹辱願子益寵珍即日馬首北我懷山林去掃跡混樵
牧躬耕得薄少持用供水菽稍遠聲利場真勝萬鍾祿
但恨與子別醉語成諄復因書寄少穎以寫我心曲

題蔡濟忠所模御府米帖

生前官職但執戟身後一字萬金值當時雷霆下收拾
世間不復有遺逸上清虛皇手自擇編呈為囊雲作級

流鈴擲火守護密君從何處見真跡知君定通玉帝籍
太微垣中賜餘墨龍騰虎卧摹不得想君神授五色筆
江南鈎鎖腕中力釵折屋漏千態出整整十卷字猶濕
光彩激射海為立平生我亦有書癖對此倘悅心若失
口吐汗下屢太息十日把玩不得食作牋天公拜稽首
乞我此老生時一雙手為君痛飲百斛酒墨池如江筆
如帚一掃萬字不停肘

枕上聞雪呈趙郭二丈

上瑞來寧玉座憂夜聲先到竹窻幽飢腸已作來年飽
病眼聊須臆月收高士清貧無弊履故人狂興阻扁舟
却思清曠江邊路鷓鴣成車酒自篋

楓橋

四年忽忽兩經過古岬依然窳堵波借我繩牀消午暑
亂蟬鳴處竹陰多

和蔡濟忠天字韻

憶我初識君屈指今七年鹽車著駸驥駕蹇紛爭先謂

當對清閒帝席半夜前稍使修世官復近尺五天如何
尚朱紱亦隨嶺海邊前山春色多佳樹午影圓散策履
幽徑方舟下長川心目得開明語笑為芳鮮但恨暝色
至不得窮攀援尚欲夜燃犀下照蛟龍淵清遊渺難繼
歸夢蒼山顛須君換鶯帖更叙山陰賢

題西湖可賦軒

風光獵獵上烏巾不那西湖爛漫春借與繩牀對修竹
為君一洗軟紅塵

賦王唐卿廬山所得靈壁石

湘江竹深韶不傳后夔神禹飛上天泗濱之磬無人編帝敕此
寶淪深淵於乎不知幾千年奇形異質鬼所鑄青虬赤虎遭縛
纏虺筋怒爪身拘攣自從邊塵瘴中原神物變化隨霏煙金聲
玉振義不辱六丁徒置康廬顛靈臺星官未知處但怪寶氣干
霄躔王郎齊居真淺源飲水泣血天所憐空山無人下羣仙似
夢非夢或告旗捫羅獨上果有得失喜而懼心茫然百夫挽取
自包裹解衣更買蠻兒氍絨局不肯鄉人說知我好古容觀瞻

焚香再拜屢歎息安得致之天子前
明堂郊丘備宮懸調和正聲薦上帝消爍羣慝收戈鋌
朝廷清明用耆舊一律四海歸陶甄鳳皇來儀獸率舞
復古却到虞韶邊是時賦公筆如椽襍牋為草登歌筵

湖上晚歸遇雨

陰雲靄靄草萋萋晚過東湖雨濕衣細柳含烟凝翠色
浮鷗戲水弄晴暉輕舟繫纜斜依岸釣子收綸欲下磯
湖上人家未扃戶兒童蓑笠負薪歸

題胡敦約山行圖

松行石磴兩崎嶇，此去長安路更迂。
底個官儂强健在，葛巾芒屨自騎驢。

送紙衾韓中父

韓郎香盡諸緣絕，壞衲篝燈供佛熏。
乞與紙衾綿樣暖，掠教醉裏一作雪夕夢紛紜。

郡侯遣騎至山中，餽名醞，輒呈長句，用黃宰韻

山前山北雨生寒，竹樹風烟蒼莽間。
青壁倚天元未見，

白衣送酒故相關共追蓮社公應許穩上籃與我欲還
後日重來拚一月細扶藜杖覓曉玩

考試呈周茂振舍人陳季陵國正

胸中五斗棘厭此十日讀紛然湘羅帕猶作春筍束先
生擇法眼一聞不再復探囊得至寶每出輒驚俗孟公
更超絕涇渭飽滄瀆從容了官事繭紙唾珠玉鄙夫聞
道晚銜鑑恐不足冥搜夜無寐慚愧費官燭何時即三
昧屈指社鶯熟秋客日夕好應到堂前菊

近得一二硯示范達笑以為堪支牀也許送端
州大硯作詩以堅其約

范郎紫玉餘半圭翻手作雲雨電隨龍蛇起陸孔翠飛
雲收雨霽千首詩薦以文錦盤珠璣夜光發屋情翁知
桂州刺史書成癡單車萬里日夜馳囊中已無去年錐
欠此石友相娛嬉范郎笑我支牀龜忽遣致我重寶齋
金印如斗不願攜愛此直欲忘朝饑君行題曰古端溪
溪石醜好紛不齊溪邊之人足漫欺須君眼力為辨之

更作萬斛之墨池為君大書十丈碑

去年三月三日雪霽入昭亭訪應庵如庵二老今年在臨川追懷昔遊用寄萬庵韻

蹇驢銜

一作踏

雪度松林齧

一作漱

石溪流有令音旋摘白

雲濡燥吻更參黃蘗印初心嵐開複嶺屏千疊凍合浮
圖玉數尋一夢經年歸去好宦情全薄此情深

將至宣城和壁間韻寄王宣子

一笑歸來見在身倒傾江水洗緇塵騎驢緩緩東風裏

知有工夫展故人

隱靜覓杉株

舊聞隱靜庭前栢虎嘯龍吟三十秋我亦經營一丘壑
無根樹子却須求

題夏氏莊

平湖漠漠雨霏霏壓水人家燕子飛欲向湖東問春色
杏花無數點征衣

和子雲白蓮

仙人玉步搖佛手白練衣新粧水底明素手風中揮
盈夜露光灑灑秋江肥寒月分好色朝霞借餘輝遙聞
功德水盡洗幻化非惟此妙花幢坐受諸天圍鄉來孤
山游未覺所見稀零落塞草邊相逢故依依結實須及
早要令飽霜威采剥登君盤勿嫌此本微

黃升卿送粽鞋

編棕織蒲繩作底輕涼堅密穩稱趾帝廷無復夢絲綉
上客還同貺珠履我家江南山水窟日日行山勞屐齒

感君投贈欲別時
布襪青鞋從此始
亨衢知子方着脚
直上雲霄三萬里
秦階歷盡却歸來
赤舄一雙應凡几

用韻簡天童應庵

敬亭松竹古叢林
二老風流舊賞音
樓閣長開太平像
鐘魚能洗祖師心
別來黃鵠還千里
盟在白鷗當再尋
却憶西堂大言客
只今高坐海雲深

舟中即事

夜行水澁舟難進
月白林稀鳥易驚
老去不堪霜露力

尊中微覺似多情

小憩孫氏竹軒觀諸公詩兩首

開軒種竹仍留客想見此翁強健時
借我繩牀小盤薄
為君試讀壁間詩

種竹主人今白髮題詩客子半青雲
北來南去何時了
風月依然只此君

與趙李二同年夜飲有懷石使君惠叔

佳月久不見忽見如故人
清風何方來過我孤竹君
我

有一尊酒政為二子斟會此風月宵更覺笑語新北城
石先生欲喚不敢頻坐上尺此客長懷渺無津南方鳳
之徒瑞世五色文鐵石賦梅花一洗瘴海氛臺家須貢
珍我欲列九閣且補諫官闕日酌白獸尊

贈張欽州

張家承平四姓侯門前列戟金城丘南來清貧家立壁
但有萬卷書滿樓雲山極觀半空寫下有花竹秀而野
閑門讀易已三年樂天知命忘華顛我行湘中識此老

難兄莫年更枯槁從來戚畹須表勸會聽鳴珂趨朝早
衡陽小隱雖深幽去天尺五君無留貂蟬兜鍪何足道
君必不為猿鶴羞

奉陪宣守任使君謁昭亭神祠二首

緩驅千騎出朝京門名喚得春回眼界青旗脚靈風來廟

步馬山蹄雪過昭亭極知太守懷忠款端為君王薦德
馨慚愧去年冬十月軍書徹夜聽鳴鈴

豐年已卜稻如京雪盡春從草際青竹裹紅旗行點點

松間白塔見亭亭煖回宿夢開寒色風約疎梅度晚馨

却憶宣城李太白也將詩句掣齋鈴

太白詩云昨日方為宣城客掣鈴交

通二
千石

王龜齡遣妓送酒賜詩走筆為謝

不復襄王夢裏雲紛紛縞袂與青裙鳴鞭枉送齋中釀
病徹杯觴欠薄醺

與薦福

湖上童童百畝陰丹樓碧閣照清深不嫌歌板相喧聒

要見桃花印此心

豐城觀音院有胡明仲范伯達汪彥章諸公題字

中興人物數諸公遺墨淒

一作依

然野寺中欲訪英靈無

處所獨搔蓬鬢立西風

入桂林歇滑石驛題碧玉泉

百折崎嶇嶺路頭一環清駛石間流須君盡洗南來眼
此去山川勝北州

敬謝經畧祕閣餘甘湯二首

甘言誤我三折臂良藥為洗五斗腸欲知苦過味方永
請試君家肘後方

此老才堪上諫坡南州留滯意如何還將苦口刷英主
醫國懸知藥籠多

寧淵觀

極目洪波渺轟轟浪接天江心分殿宇勅賜號寧淵日
照山如畫雲濃小似烟休尋蓬島地只此水中仙

兩宋名賢小集卷一百四十四

欽定四庫全書

兩宋名賢小集卷一百四十五

宋陳思編

元陳世隆補

于湖集卷中

金沙堆廟有曰忠潔侯者屈大夫也感之賦詩

伍君為濤頭妬婦名河津那知屈大夫亦作主水神我
識大夫公自托肺腑親獨醒梗羣昏聚臭醜一薰瀝血

摧心肝懷裏如不聞已矣無奈何質之雲中君天門開
九重帝曰哀汝勤狹世非汝留賜汝班列真司命馳先
驅太一諏吉辰翩然乘回風脫迹此水濱朱宮紫貝闕
冠珮儼以珍宓妃與娥女修潔克下陳至今幾千年玉
顏凜如新楚人殊不知謂公果沈淪年年作端午兒戲
公應嗔

詠雪

東皇攜春來屬車載霓裳回風作妙舞雜珮鳴珠璫千

官玉笋班再拜稱瑤觴酒罷各分瑞圭宗粲琳琅浩蕩
涵濡恩一笑徧八荒塵垢得湔洗焦枯亦輝光偉哉造
化力天地為翁張功成了不居杲日天中央

賦沈商卿硯

石渠東觀天尺五壁星下直圖書府琳琅寶鎮出三山
浩瀚簡編照千古右文儲硯一百九鈿匣珠囊護瓊玖
有時清夜發光怪諸儒縱觀容拜手一朝收跡歸故園
瓦池葦管塗寔烟夢尋清都故歷歷起凭書案空潸然

眼明見此超萬石色如馬肝涵玉質白圭之玷尚可磨
澁不拒筆滑留墨摩挲太息不自已呼兒汲水為湔洗
天遺至寶瑞吾子要與詞林壯根柢子行飛騫為帝須
西清承明有佳謨取功翰墨倘乞我田間自抄種樹書
任守作醮為民祈福先期而雪是日開霽

紫府仙人自列真綠章封事更通神清塵已作連霄雪
不夜潛回萬屋春玉節珠旒來浩蕩雲車風馬正紛綸
步虛聲徹朝元路便挈荷囊款帝閨

應菴退席蔣山寄居昭亭萬壽三請不得已而應
輒贈長句兼簡蘇內翰尚書二首

逍遙丘壑欲忘年忽作風蟬脫骨仙鍾阜卻從三昧火
靈巖重要一燈傳極知掃迹終無策且與臨歧快着鞭
莫作山林城市想從來大隱故居屢

不寄音書又隔年因師問訊玉堂仙碧油早覺儒為貴
青海應無箭可傳憶昔絲綸催喚仗何如沙路聽鳴鞭
生涯落寞公知否準擬松江受一廛

德慶范監州以子石硯寵假雖小而奇戲作二首
曾侍虛皇玉案前夜書繭紙筆如椽莫嫌此石規模小
一寸玄雲萬斛泉

端溪別駕極風流白壁明珠不暗投笑我支牀已多許
須君隱几更冥一作宜搜

題朱元順梧溪圖

去年過梧溪王事有期程夜半度湘水但見天上星平
生中興碑夢入紫翠屏已辦北歸時十日窮攀登今朝

復何朝忽此短軸橫歷歷眼中見湘山無數青白雲着
山腰樓閣秋氣明便欲扶短策下濯滄浪纓主人山水
仙妙處心自評元順骨已冷千載交蓋傾賞音寄幅紙
益見忠孝情題詩疥公畫託我不朽名

大雨呈同行諸公

我船千斛初甚遲上灘下灘風薄之百夫撐挽才得過
水淺舟大行無期同來賓客笑鈍滯一葉自買如鳧鷖
瞥波急槳亂藻荇瞬息不見颿車馳忽然昨夜雷雨作

墨雲頽山風捲壑龍門春漲魚鼈亂千渚宵明鬼神惡
蓬飛纜斷泊不得容只一身無處着長年絕叫客驚起
一浪先掀半船水囊衣漂盡到中履一夜奔忙沙石裏
我時甘寢殊不覺但怪颼颼風到耳起來呼酒自勞苦
水滿涼生差可喜鄉來笑者今却悲人生淹速那能知
明朝轉柁我船快喚客同船莫嫌隘

和曾裘父韻送老人赴鎮江

邊箭收聲江不波廬山高處與天摩向來只作青蛙計

此去無如紫詔何
鯨起江濤煩翦拂
經餘蓮社更磋磨
文成本自籌帷幄
不擬點彭戰伐多

以水仙花供都運判院二首

十月西湖冰齒涼
梅間松下小齋房
幽芳靚色天為笑
落莫南來也自香

瘴土風雲亦有此
却疑姑射是前身
冰肌玉骨誰消得
付與霜臺衣繡人

再和二首

雪屋因君發妙思作歌可比漢芝房根塵已證清淨慧
鼻觀仍薰知見香

玉壺寒露映真色霧閣雲窻立半身可但凌波學仙子
絕憐空谷有佳人

寄題向彥績使君采菊堂

使君天資高風昔事幽屏長懷渺丘壑餘習謝鍾鼎東
籬義皇人槁死骨已冷淒其千載後妙處一笑領高堂
娛白髮兄弟極整整不須南陽泉壽與日月等

和總得居士康樂亭韻

氣格稜層壓大千塵囂遠盡思翛然龍門不障洪河決
喬木終隨故國顛柳下煨工真得道竹林酒友漫稱賢
先生義槩雲天薄千載參渠活句禪

和仲欽題粉巖

一麾縻我欠追從悵望千山紫翠重忽向郵筒得新句
知君正在碧蓮峰

昨日極暑今日極寒

昨日大流金今日風折膠昨著疎布衣今衣敝緼袍赤帝與玄冥
凜凜隔一宵聊將擁爐適換此揮筆勞冰炭欲盈懷爽涼不崇朝
幻生過隙駒是身九牛毛等是一寒暑胡為自缺嘲萬法從心生
心靜境亦消悟此本來無綵締同狐貂還當隱吾几試聽萬竅號

仲欽寄民為重齋詩和答五首

齋中寒日影瓏璁齋外參天十八公二十四州民樂否
莫教一物怨途窮

玉節南來兩使星埋輪折檻有家聲不嫌齋榜民為重

去國當時一葉輕

德意丁寧到綠林
都捐刀劍作齊民
皇華入秦天
願喜
趁得朝元第四春

行邊使者幾時回
寄我清風欲滿懷
已把十詩鐫樂石
為公滿意落新齋

蠻烟瘴雨侵行李
每向南雲有所思
定自為民忘涉險
請君細讀寄來詩

初得愛巖

高巖劃天門仄徑通乳穴隈堆青螺髻喘嶮白玉闕外
有虎豹蹲中恐蛟蜃蟄東榮俯雷電西出挾日月萬壑
生悲風六月不知熱但覺駭心目未易紀筆舌平生山
水趣嶺海最奇絕洞府二十四未厭屐齒折晚乃得遊
此餘地皆僕妾同來六七士嗜好頗相躡舉酒酌山神
慰我久湮滅

寄張真父舍人

投分生平不數人憶陪文館笑談新
資中冢樹看成拱

荆府詩筒跡又陳已恨別離空歲月那知邂逅亦參辰
古來命駕須千里薄宦區區愧此身

從珪老求竹

東窻便種千竿竹準擬清風六月涼傳語報恩珪長老
相煩去作竹街坊

與邵陽李守二子用東坡韻

兩季有佳句冰雪灑肺肝清越石在懸圓熟珠走盤吾
家十二樓下俯千仞湍誰掣白玉瑣借與二子看臨風

度長邃瘴海為清寒卻立望九州隘陜非所安便欲馭
長鯤九萬扶搖搏神山在吾牖弱水空瀰漫回首五十
劫不費一指彈絕笑塵中年攝提與滌灘

吳城阻風

吳城山頭三日風白浪如屋雲埋空北來大舸氣勢雄
車帆打鼓聲訔訔吾船正爾不得去跼促沙岸如鳧翁
長年三老屢彈指六月何曾北風起由來官儂多齟齬
世不汝諧神亦爾我愧此言呼使前順風逆風皆偶然

皇天廣大豈有意相汝嗔喜庸非偏
瓶中有粟囊有錢
與汝飽飯姑留連

中秋觀月齊雲樓用孫昌符韻

玉宇無塵夜氣清
銀河徹底素波明
人應好月同千里
身在高樓近五城
丹桂定知憐我老
綠荷何惜為君傾
建章鵲鵲當年夢
便欲憑空上玉京

偶得四月菊以奉提刑運使二首

午陰籬落小徘徊
底許清香鼻觀來
定自霜臺風力峻

故教霜菊暑中開

金縷裁衣玉綴裳
掃除障暑作秋香
一杯擬做重陽賞
更借西風一夜涼

鄭儀寧送蓴菜

我夢扁舟震澤風
蓴羹到筯晚盤空
那知嶺外炎蒸地
也有青絲滿碧籠

奉送李彥國還廬陵

李生來嶺南
自挾書一束
食簞寄蕭寺
矻矻晝夜讀餘

子尚頭角文作翻手速小試不盡能他日真可卜里中
老仙伯曾對玉堂宿高節老彌厲名蓋斗南北掖垣我
畏友不愛萬鍾祿卷藏一丘下勲業所迫逐於歸問道
要儲作饑歲穀富貴偶然耳吾欲子金玉

暑甚得雨與張文伯同登禪智寺

老火陵穉金聚作三日熱舟行湘江上蒸煮到魚鼈黑
雲起東北一震山石裂不知雨來處但見風捲葉銀河
倚天瀉高浪舞飛雪只聽打蓬聲已覺涼意愜岸旁

古佛屋樓殿頗喘不辭衝泥去一看雨脚闊吾宗紫
巖客窮若志不懾自吾來浯漢奔走已自浹我懶久廢
學愧子來挈挈相攜得偉觀為子熾然說願子領話頭
吾今指標月

過昭亭哭二弟墓

陌上春風久已歸墓頭衰草正迷離白頭未拔三年淚
黃壤長埋短世悲憶昔追遊常並轡只今獨往更題詩
兩兒二弟俱冥漠顧影伶俜欲語誰

贈甘法曹

此嶽仙人汗漫遊，斯文曾到海邊州。
誰憐詩禮甘公子，牢落青山向白頭。

丙戌七夕衡陽境獨游岸小寺

七月暑中行，道路萬里賒。今夕已七夕，我猶在天涯。
繫船蒼石根，人影散晚沙。上岬是修竹，仄徑如行蛇。
茅屋四五間，往昔佛所家。經禪劫火盡，舊觀初萌芽。
牆疊古瓦盆，僧被破袈裟。喜聞柱杖聲，掃地自點茶。
何以為我

娛冰雪汲井花一洗十日渴分涼到童髻盈盈牛女期
不著雨洗車疎星銀漢動新月玉鈎斜更呼老奚官卷
蘆作鳴笳莫驚潭中龍聊起棲樹鷗

金沙堆

玻璃盆中金作堆葯房桂棟中天開洞庭無底蛟蜃惡
君不喚我那能來旁船守風四十日我行昨日到磊石
山頭望君乞杯玳僮僕歡呼得頭擲二更南風轉旗腳
打鼓開船報君德君今清都豈其食聊須飽醉撐船儂

明日依舊行南風

贈邕州滕使君

千騎東風白玉鑣，十眉環坐紫檀槽。
安南都護來鰲禁，建武將軍握豹韜。
瘴雨蠻烟驚鼓角，朔雲邊雪滿旌旄。
夕烽不到甘泉殿，尺一徵還近赭袍。

登七星山呈仲欽二首

魁杓歷歷控雲嵐，地闊天虛萬象涵。
不與天公管喉舌，猶堪嶽立鎮湘南。

便驅匹馬出烟嵐
聖主恩深若海涵
却道幾重杯斝地
載來恩醞過江南

福巖

丙戌七月

行行山益高
所見益以竒
煮茶南臺寺
更上千級梯
道傍古時松
閱世心已灰
不與歲月競
况受霜雪威
路回聞鐘聲
實刹隱翠微
排空寫金碧
剉石著拱枿
門前兜率橋
劫火昔所遺
神龍厭庠陋
一炬然枯萁
談笑舊觀還
殿柱百尺圍
老禪七十餘
高與此山齊
大屋貯龍象

空巖走金犀齋盂細細參正味無鹽醢頗聞三生藏中
有萬寶齋佛牙舍利湧貝葉旁行稀剖蚌慈相尊破匣
血縷飛稽首所願觀為洗往昔非卻尋上山路擬看浴
日池急雨忽留入吾其少須之

湖湘以竹車激水杭稻如雲書此能仁浣壁

象龍喚不應竹龍起行雨聯綿十車輻伊軋百舟櫓轉
此大法輪救汝旱歲苦橫江鎖巨石濺瀑壺城鼓神機
日夜運甘澤高下普老農用不知瞬息了千畝抱孫帶

黃犢但看翠浪舞餘波及井白春玉飲醅乳江具誇七
蹋足繭腰背僂此樂殊未知吾歸當教汝

欲雪

欲雪未雪天糝糊凍行沙尾鷓鴣呼北風刮耳立不住
更騎鈍馬穿枯蘆兩生憐我意不舒江頭三日占檣烏
高堂明朝置安輿買羊沽酒償勤渠

夜讀五公楚東酬唱輒書其後呈龜齡

同是清都紫府仙帝教彈壓楚山川奎躔錯落珠連緯

嶽鎮苔甍柱倚天宮羽在縣金奏合驂騶參隊寶花鮮
平生我亦詩成癖悔却來遲不與編

薦福觀何卿棋壁間詩對之悵然次前韻

金華老子定雕仙翰墨文章編兩川遺跡已驚風落木
高名依舊日行天人間易得朱顏老寺壁空懸玉唾鮮
欲繼二賢歌薤露巖詩杜集儻同編

再用韻作五公詩

如公韓子定飛仙更喜門人老玉川莫厭詩筒頻度嶺

即看侯弁去朝天飛龍位正雲霄近集鳳樓高彩色鮮
我欲扁舟君記否但教歸去雜民編

蒙侍御丈再用韻作送行詩走筆和答迫放船不
暇工也

憶曾總領道山仙自挽狂瀾制百川廷策萬言功蓋世
臺評三上力回天楚東賸喜詩郵速天北催頒詔墨鮮
我老江湖堪野史看公勲策手親編

壽老送使者以齋素不置餞二首

火雲飛焰擾簷前
淨滌齋廚幾不羶
定自隨車有甘雨
為言星使早如鞭

藩府東行迓綉衣
海雲山月照旌麾
錦囊賸有新詩句
寄與幽人莫遣遲

贈黃司法

吾友王升卿乃是天下士
阿翁苦硬節御坐留諫紙辛
勤教其子不但為科第一官
法曹掾整整老須忌吾行
桂嶺南所得但五子願渠自
愛惜窮達初不計功名倘

來耳期子以千歲

宵征

畏暑倦長道呼童戒宵征三更渡前溪溪水清且鳴舟
人自相喚炬火如疎星俯視亂石多仰見北斗橫微微
白露下磔磔宿鳥驚竹與山林薄十里月漸明光彩散
草木涼意侵冠纓

泛湘江

十日行湘江湘水清而溫不療亭午渴却憶土井渾道

傍古剎竿着屋高樹根飛泉出山腹甘冷冰瓶盃何止
解百憂一洒塵埃昏設供者誰與稽首兩足尊

餘干趙公頤賢宗室也魏公題其堂曰養正且為
作銘取易頤之義刻碑堂上予過之為賦詩

眼裏紛紛不要同從教三徑滿蒿蓬肯來與子談周易
此去何人識魏公家近星辰雙闕北身居烟浪五湖東
清臺有日占雲氣一丈豐碑夜貫虹

風洞

山入烏蠻連越舊天開斗野對珠宮應憐嶺海長炎熱
乞與清涼萬竅風

秦城

塹山堙谷北防胡南築堅城更遠圖桂海冰天塵不動
那知隴上兩耕夫

岸傍偶得木犀

天公不求金富媪不復藏居然土同價散作草木芳英
英園中葵一心傾太陽采采籬下菊令汝壽命康惟此

木之犀更貯萬斛香
雄姿傲霜雪鱗鱗森青蒼
三賢鼎足立正色
凜相望豈比桃李徒
紅紫紛披獨聊息
貪者心來上君子堂
歲晚從我遊
真汝兄弟行

贈朱遠遊

遠遊何方來
峩峩古衣冠
袖中三百篇
貯月白玉盤
溪清石瀨急
雪凍銅壺乾
有如山澤仙
外瘠中氣完
便合朱絃彈
細着青瑤刊
懷哉人未識
飛步江風寒

和張欽夫尋梅

寒梅本無心適與春風期孤根擢歲晚桃李更媚之取
我碧玉壺薦此白雲枝故人不可寄耿耿空自竒故人
隔湘江獨立知者稀采香正滋蘭忍饑不食薇拏舟許
過我此約不可違江南烟雨村願與子俱歸

鑑湖納涼

鑑湖周圍三百里極目平湖清到底荷花歲久生滿湖
人來採蓮唱歌起賀家千頃水雲鄉六月荷花風最涼
短楫輕舟來斷續山橫曉月正蒼蒼

雞籠福地在歷陽將至豐城望一山宛然感之賦

詩

黃茅白葦徑才通忽見晴嵐掃翠空從吏只今俱蝨戶
仙山何許是雞籠逢人漸覺交游少問路仍行盜賊中
自是麤才合麤使瘴鄉那得便途窮

西湖

岸草汀花對夕陽滿船新月夜鳴榔秋清菡萏紅干柄
風靜琉璃白一方

勸范東叔飲

今代太史公四海范氏門斯文十世澤班班被諸孫我
識叔西父白玉比潤溫今來見令弟俊氣百馬奔一第
潤子耳勿愧而家尊臨分無多言更酌老瓦盆

入清江界地名九段田沃壤百里黃雲際天他處
未有也

野水瀾漫欲漲川稻雲烘日更連天定無適粵千金索
可買臨江九段田黃犢眠邊高樹蔭白雞啼處遠炊烟

此中若許投簪紱便老鋤耰卜數椽

寒光亭

亭依三塔占清幽松竹環除翠欲流
晚色晴開千嶂月波光冷浸一天秋
瓊瑤影裏詩僧屋雲錦香中釣客舟
風送不知何處笛雁聲驚起荻花洲

兩宋名賢小集卷一百四十五

欽定四庫全書

兩宋名賢小集卷一百四十六

宋 陳 思 編

元 陳世隆 補

于湖集卷下

和沈教授子壽賦雪三首

北風吹來燕山雪十萬王師方浴鐵
風纏熊虎靈旗靜
凍合蛟龍寶刀折何人夜縛吳元濟
我欲從之九原隔

東南固是王氣勝西北那憂陣雲結豈無祖逖去誓江
已有辛毗來仗節

今年米貴更風雪破屋荒涼冷於鐵道人三日不出門
卧聽敲簷竹枝折高吟忽送三十韻靚面未覺千里隔
此公也是可憐人家徒四壁衣鶉結君不見漢時蘇子
卿窖中齧糲終持節

天公作劇已三白刮面東風利如鐵只今斗米錢數百
更說流民心欲折敵騎打圍涂塘北煙火穹廬一江隔

陛下宵衣甚焦勞微臣私憂長鬱結爾曹忍凍不足說
我輩何時立奇節

留題彭澤故縣修真觀

五月問修途今日一百里莫投彭澤縣愧此邑中士古
觀官道傍借榻暫少憩較彼靖節翁衷情相謬戾不能
早投簪一官苦匏繫見人屢折腰奔走徒自蹶聊為奴
僕飯明日更蚤起速過栗里去毋遺高士鄙

呈樞密劉恭父

鼎席方虛望已隆上游那得更煩公敢言兩鎮成交契
自是孤根累化工舊弼新開元帥府間官且領太平宮
歸家淨洗如椽筆準擬燕然勒駿功

翁子功湯補之遠送海錯甚珍

白虱烏羊未見曾青虵赤蟻當常珍忽驚海物來登座
能致南烹有故人萬里漂流憐逐日百年麤糲愧嘗新
新筍恰趁來時熟細酌梅花雪片春

張仲欽朝陽亭

亭在建康

便合朝陽作鳳鳴江亭聊此駐修程南瞻御路臨雙闕
東望仙家接五城日上白門兵氣靜春歸淮浦暗潮平
遙憐幕府文書省時下滄浪自濯纓

舟中五首

扁舟東去幾時還身寄雲濤泱泱間一夜櫓聲鳴到曉
覺來滿眼是他山

山圍平遠水浮天目送歸鴻落照邊好趁新年釀雲液
歸來猶及牡丹前

亂山深崦小溪斜野水微茫浸斷霞一笛晚風生碧樹
始知林裏有人家

南來北去祗紛紛又過荆山一月春笑殺風前桃李樹
飄蓬猶作未歸人

泊船江口夜深深月傍篷窻照淺斟隔岸漁燈半明滅
不眠空有故人心

喜雨

已晴復雨雨還晴慣閱人間夢不成小立闌干搔短鬢

亂雲飛渡夕陽城

湘中館

雲去月在沙潦淨秋滿川北斗掛落木西風送歸船去
年過湘中夜半投馬鞭篝燈洗塵土所見只屋椽雞鳴
問前途殘夢兀擔肩那知闌干外有此山水妍微微清
露溥稍稍明河偏孤光更自照靜極欣所便身世兩悠
然吾其逐飛仙

中隱

吾家中隱君才比萬斛泉短小精悍姿一劍當雄邊去
年柳州賊俯視衡嶽巔君從襄陽來孤忠作戈鋌談笑
百雉安淨洗湖嶺煙謂當醕王勳金印如斗懸言歸遽
如許此意誰為宣小隱即居山大隱即居廛夫君處其
中政爾當留連早晚有詔書喚君遠朝天欲為中隱遊
更著三十年

送張司戶還蜀

似向川人有夙緣交游存沒最多賢今年初識張公子

六月還尋上水船，萬里親庭心已到。
一杯別酒意空傳。
西行賸有新詩句，寄我應書十樣牋。

廣右道中二首

參天古木綠陰合，峻極層巒瀑布長。
啼鳥一聲家萬里，依然無語對斜陽。

觸鼻野花香，泛泛勸歸啼鳥意。
諄諄嶺南三月已煩暑，猶向江頭細問津。

贈鹿苑信公詩禪二首

詩卷隨身四十年忙時參得竹筲禪而今投老湘西寺
卧看湘江水拍天

句中有眼悟方知悟處還同病著錐一箇機關無兩用
烏窠拈起布毛吹

聞德遠與曾裘甫黎師侯會飲范周士所三首

海棠開後碧桃開寒食人家燕子來一病閉門三十日
更無屐齒列蒼苔

張飲名園樂有餘奉常何苦但齋居一杯我亦垂涎甚

病起無聊只羨渠

臞曾句法早知名
新築詩壇五字城
不要緋袍憐范叔
應將石鼎調彌明

萍鄉境上有驛傍有老杉餘百本
余過而愛之驛無名
余名之曰愛直而為之詩
又以告邑大夫趙君
公廩曰使繼自今為令者
幸如君之賢也則此杉長存
不然將斧斤斯民以自封
植于杉何有

此杉已百年
林立官道側
鬼神所訶護
斧斤不敢迫
愛

此遺直姿凜凜有正色未云支大厦聊以蔭行客作詩
調令尹為我驛壁刻但使杉長存懸知子清白

遊千山觀

朝遊七星巖莫上千山觀東西兩奇絕勢畧嶺海半長
江寫縑素疊嶂俯杯按中有萬雉城鐵立不可玩伏龍
起雲雨老樹舞影亂衝風挾驚電意恐崖谷斷路懸石
磴滑衆客紛駭汗嵌空偶自托發若鳥集灌須臾便開
霽杲日麗清漢却坐山巔亭容我烏幘岸長懷付樽酒

別語不容判會須九垓外與子期汗漫

麒麟硯滴分韻得文字

素王西狩麟筆削昌斯文茂陵一角獸妙語聞終軍壯
哉筆硯間英姿欲擎雲名參龜龍瑞威掃狐兔羣豈獨
濡毫端政爾清妖氛會當獻君王玉殿春夜分輸寫胸
中奇思波被無垠

幽興

海涵太陰日西墜畫角一聲城欲閉柴門闕上濯足眠

萬事不如高枕睡睡鄉廣大我能容兀兀騰騰興莫窮
推枕起瞻河漢近月明庭竹響清風

和仲彌性煙霏佳句兼簡二車二首

收斂經綸寄一麾戲分風月與煙霏醉餘綵筆三千首
老去蒼官四十圍露菊浦秋催落帽蠟花摧夜照更衣
登臨縱好難留滯白髮雙親待汝歸

引手星辰逼太微盪胸雲物散空霏莫山好處青成案
秋月明時雪打圍竹洗佳人千點淚荷翻仙子六銖衣

巖西定有漁翁宿障雨攔風不肯歸

庾樓和林黃中韻

九月扁舟下水風一尊佳處與君同
眼高四海氛塵外詩在千山紫翠中
傾座只驚談麈白踏筵不怕舞衫紅
樓頭今古無窮事醉倚胡牀月滿空

水仙

淨色只應撩處士國香今不落民家
江城望斷春消息故遣詩人咏此花

賦衡山張氏米帖

人物千年海嶽翁
筆精墨妙與天通
傳聞有帖藏張姓
怪底湘江月貫虹

欽夫折贈海桐賦詩定叟晦夫皆和某敬報況
童童翠蓋擁天香
窮巷無人亦自芳
能致詩豪四公子
不教辜負好風光

勸農以湘波不動楚山碧
花壓闌干春晝長為韻
得干字

積雨已連月長沙尚春寒今朝定何朝喚客來江干問
訊湘西寺露重江漫漫聊須萬斛舟湍此千尺湍老松
如相迎翠落頭上冠却望城中花寶髻垂珠鬢勸農有
故事般樂非所安薄晚會春園老稚隨馬鞍羸肩侑尊
酒呼喚來同盤從容及鄙事爾汝開心肝我是耕田夫
偶然此為官飽不知稼穡愧汝催租瘢願言各努力長
年好相看

陳仲思以太夫人高年奉祠便養卜居城東茅屋

數間淡如也移花種竹山林丘壑之勝湘中所無
食不足而樂有餘謂古之隱君子若仲思者非耶
乾道戊子六月某同張欽夫過焉徘徊彌日既莫
而忘去欽夫欲專壑買鄰卜居有詩某次韻

平生交游中此士故耐久不折為米腰頗袖斲輪手卜
居並東郭草草宮一畝日課種樹書箋題偏窻牖花草
當妻妾松竹是朋友上堂娛老親家飯隨野韭客至即
舉詩興來亦沽酒清溪遠屋角古木老未朽翻翻荷見

背戢戢魚駢首幽觀天所藏勝踐我獨後不因南軒君
茲遊幾時有為君便賣鄰溪南好山阜我喜君亦狂呼
兒挈尊卣一灑塵埃胸快若苗去莠晚涼佳月出人影
散箕斗恨我當先歸君能小留否

樞密端明先生寵分新茶將以麗句穆然清風久
矣不作感嘆之餘輒敢屬和三首

伐山萬鼓震春雷春向家山挽得回定是君王思苦口
便同金鼎薦鹽梅

先生筆勢挾春雷
春色先從筆底回
欲笑麤官成漫與

望林止渴竟無梅

茶為邗卒所竊
但詩筒至耳

詩腸隱隱轉飢雷

一作殷雷
一作驚雷

春困無人與喚回
強續新

詩終不似空傳衣鉢向黃梅

送慈曼如金山迎印老住大滌

傳語金山山下龍
乞將上水一帆風
道人自有飛空錫
只載中泠十丈洪

小山書院

萬里清江占一灣
藁生桂樹點幽閒
誰人得似劉郎子
賦到淮南大小山

送邵懷英分魯直詩韵
人間風日不到處
天上玉堂森寶書
得書字

將酒澆君車
問君行何如初
無十萬錢但有一束書
往昔千官班
渠曾綴簪裾
日月九門隔
江湖十年餘
老幹久凌剝
寒灰費吹噓
今者尺一追
問津承明廬
蓬萊道
家山紫極帝所居
功名儻來爾
步武當徐徐
遙岑出疎

林淺水行遊魚臨分再三囑音信莫我疎

送張定叟

戊子歲二月定叟如南山行李太匆草問君何當還敬
展南陽阡永慕涕已潛畢事却登覽紆子悲悴顏羣峰
最高處眼界窮塵寰紫蓋款佛刹黃庭叩玄闕夜榻藉
雲衲曉窻闔煙鬟野飯薦笋蕨幽尋剪榛菅酒賤可痛
飲詩成要重刪勿作賈胡留閨人賦刀環歸時買竹鱧
小破行囊慳

讀書堂在烏江即唐張文昌讀書處自五代至宋
皆世守之渡江後為史氏所有

漫有五車書不讀豈似一編勤過目癡兒鬻肆蠹魚書
巨富牙籤塵滿屋市南水竹一畝空平生腹笥史長公
閉戶却掃得真樂冥搜萬古窺鴻濛淹留歲時亦何有
策勛茲事要持久吾家文昌讀書處好在溪山落君手
上方治定登文儒東觀石渠森寶書望公起直承明廬
從來海內知名士須讀人間未讀書

風雨石首呈同行寄荊州舊僚

昨日離筵酒未醒今朝風雨暗江亭
近人積水全成綠
隔岸荒山夜却青
野史衣冠行木偶
客船燈火散疎星
寬程且作三旬約
要看廬山紫翠屏

江行再用前韻

澤畔行吟我獨醒
歸程不計短長亭
西風送浪頭頭白
芳草隨人段段青
昨夜疎篷猶窘雨
今朝嚴鼓欲侵星
無人去喚華容宰
畫我江行作小屏

夜半走筆醜壽翁二首

短篷掀舞不得寐
忽枉新詩手自開
主人留客不作意
更送一江風雨來

二年塵土堆中坐
一到南樓眼暫開
風靜江平留不得
特教黃鵠送詩來

琵琶亭二首

江州司馬舊知音
流落江湖感更深
萬里故人明月夜
琵琶不作亦沾襟

潯陽江上琵琶月彭澤門前楊柳風
兩賢底許不相似
哀樂雖殊吾意同

朱陵洞

黑雲起我趾白雨過山脚却立朱陵洞
一望紫虛閣
神丹我已秘仙臂真可握
試向靜處聽空濛
有笙鶴

一覽亭

城中十萬戶亭脚五千丈
小退鴈鷺行却立雲霄上
主人心如坐子鏡中像
沙尾是我船煙波更空曠

睡起

睡起有佳聲蕭蕭竹間雨
蒿廬淡無營一榻不受暑
微颺入牖來喚起香中縷
撫卷忽超然空梁走饑鼠

去臨川書西津漁家

作客臨川又一年却尋歸路淺灘船
宦遊到處真聊爾別恨何須更黯
然夾道長紅慚父老繞城濃碧記
山川無端此地成留滯定自從渠有
宿緣

上元設醮畢作長句

綠簡朱書自叩真馥爐香霧晚網緼雪花便作茶花白
春色還隨月色新江漲不憂堤萬丈年豐何啻粟千囷
微生只擬休官去拜昨歸來吉夢頻

過三塔寺二首

湖光瀲灩接天浮風捲銀濤未肯休夜岸繫舟來古塔
不妨蹤跡更滯留

層巒疊嶂幾重重萬頃烟波浩渺中釣艇未歸鏡夕照
耳邊蘆葦戰寒風

玉淵亭

靈源直上與天通
借路來從五老峯
試向闌干敲拄杖
為君喚起玉淵龍

萬杉寺二首

莊田總是昭陵賜
更著官船載御書
今日殘僧無飯吃
却催積欠意何如

老樹參天一萬株
廬山佳處著浮圖
只因買斷山中景
破費神龍百斛珠

三塔寺寒光亭

見南畿誌
剎志增

亭依三塔占清幽松竹環除翠欲流
曉色晴開千丈月波光冷浸一天秋
瓊瑤影裏詩僧屋雲錦香中劍客舟
風送不知何處笛雁聲驚起荻花洲

咏梅次韻二首

樓上簫聲欲斷魂仙官分與一枝春
旋推粧額添新樣細撚香鬚數玉塵
月下精神宜淡貯雪邊肌體更清勻
老來花事無消息只有君詩當寫真

天與孤標不受塵生憎桃李鬪芳新詩成名下無虛士
花在身邊當麗人只恐素英欺白髮試煩纖手插烏巾
風流今代神仙尉管得河陽縣裏春

楞伽寺三絕

硃砂峯下楞伽寺白髮僧生乙丑年乞我一杯清淨水
為扶脚力上層巔

天圍欲盡三千界地險真成百二關不向中峯最高處
諸君原未識廬山

山北山南劫火餘如何留得此僧居

一作廬

可憐鐘閣三

枝竹無復山房萬卷書

鷺溪

蒼龍翔舞餘千仞瀑水奔流欲百盤
定自山靈憐寂寞故教臨鏡有窺鷺

漪澗堂

水漫春洲到處通檣杆無數插空濛
主人只愛堂前木不放廬山入眼中

子餘許修草堂遺句勸請

蓮社高人久寂寥
草堂風物故蕭蕭
追還舊觀須公等
喚我它年寄一瓢

有懷長沙知識呈欽夫兄弟二首

春風花柳又芳妍
更接髯郎水竹園
小閣橫橋俱勝絕
只應欠我共開筵

召公分陝是東鄰
天遠堂中好主人
更喜新來黃太史
賸拚佳句了新春

題塔子寺

醑醑壓架玉交加深院無人有
落花却憶江南田舍樂
旋敲生火煮新茶

題斷堤寺三首

柔桑細麥綠油油雲水烘春爛
不收馬上困來尋歇處
斷堤寺裏半時留

堤邊楊柳密葳蕤堤上遊人兩
鬢了可惜行春來較晚
誰家留得碧桃花


古寺留春最得多
紫微花畔海棠窠
無人歲晚同幽獨
古栢陰森著薜蘿

山居

松韻笙竽徑雲容水墨
天人行秋色裏鶯語落花邊
修竹三間屋清泉二頃田
了無官府事鷄犬慕神仙

四川總志

御選



兩宋名賢小集卷一百四十六